

Pentekoste ondorengo Igandea

Ekainaren 16an

HIRUTASUN GUZTIZ SANTUA

Kontenplalarien aldeko Jardunaldia

Agurra

Jesu Kristo gure Jaunaren grazia eta Jainko Aitaren maitasuna eta Espiritu Santuaren batasuna izan bedi zuekin.

Sarrerako oharpena

Eukaristia beti da Aitari egindako gorespena, Jesu Kristoren bidez egina, Espiritu Santuaren batasunean. Gure Jainkoaren misterioa aldarrikatzen dugu gaur: Jainkoa elkarte da. Bedeinka dezagun Haren izena, eskertu dezagun Haren errukia.

Otoitzari emanak bizi direnak, lekaide eta lekaime kontenplalariak gogoratuko ditugu gaur. Eliza osoaren alde, mundu osoaren alde otoitzean bizi dira beraiek. Gaur guk egingo dugu otoitz bereziki beraien alde, Jainkoari eskerrak emanez, Eukaristia santu honetan.

Damu-otoitza

Eska dezagun apaltasunez Jainkoaren barkamena eta errukia:

- Jesus Jauna, zeruko Aita ezagutzera eman diguzuna: erruki, Jauna.
- Jesus Jauna, Espiritu Santua gure bihotz barrenean jarri diguzuna: Kristo, erruki.
- Jesus Jauna, Aitarekin eta Espiritu Santuarekin elkar maitasunean an bizi zarena: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizitzara

Otoitza

Jainko Aita,
egiaren Hitza eta santutasunaren Espiritua mundura bidaliz,
zeure misterio miragarria agertu zenigun gizon-emakumeoi;
emaguzu, egiazko sinesmena aitortzen dugunoi
betiereko Hirutasunaren aintza ezagutzea
eta haren Batasun ahalguztiduna gurtzea.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta errege bizi baita gizaldi eta gizaldietan.

Hitzaren liturgiari oharpena

Askok dio Jainkorik ez dela edo isilik dagoela. Baina bihotzez garbi denarentzat, hurkoa maite duenarentzat eta gauza harrigarrien aurrean liluratzen denarentzat Jainkoa ez dago isilik. Holakoentzat Jainkoa beti da berritzailea.

Lehenengo irakurgaia (*Es Za 8, 22-31*)

Esaera Zaharren liburutik

Honela mintzo da Jaungoikoaren jakinduria: «Bere asmoen hasieran sortu ninduen Jaunak, aspaldiko bere egintzen hasieran. Aspaldienean nengoen ni eratua, lurra izaten hasi baino lehenago.

Ur-handirik ez zenean sortu ninduen, iturririk ez zenean. Mendiak oinarrietan gogortu aurretik; muinoak baino lehen sortu ninduen. Lurra eta belarra, eta munduaren hauts-gaiak oraindik egin gabe zeuzkan.

Bigarren irakurgaia (*Erm 5, 1-5*)

San Paulo Apostoluak Erromatarrei

Senideok: Fedearen bidez zuzentasuna iritsi dugunez gero, bakean gaude Jaungoikoarekin, Jesu Kristo gure Jaunaren bitartez. Berari esker zabaldu zaigu, sinesmenaren bidez, bizi garen grazia honetarako sarrera, eta harroturik gabiltza Jainkoaren seme-alaben aintzaren itxaropenean.

Ez hori bakarrik; estualdietan ere harrotu egiten gara; jakinik, estualdiak eroapena dakarrela, eroapenak onbide sendoa, eta onbide sendoak itxaropena. Eta itxaropenak ez du huts egiten; Jaungoikoaren maitasuna gure bihotzetara isuria baitago, eman zaigun Espiritu Santuaren bitartez.

Aleluia (Ik. *Ap 1, 8b*)

Aintza Aitari, eta Semeari,
eta Espiritu Santuari;
baden eta bazen eta badatorren Jainkoari.

Ebanjelioa (*Jn 16, 12-15*)**Homiliarako argibideak**

Aitarena den guztia nirea ere bada

Bere xalotasun eta tolesgabetasunean, bere familiari buruzko guztia kontatu digu Jesusek, baita gauza intimoak ere, bai baitzekien ez

zegoela ezkutatu beharreko trapu zikinik. Hark hitz egin digu Jainko Aitaz, Semeaz eta Espiritu Santuaz. Guk, fededunok, ezagutzen ditugu pertsona horiek, eta **familia-harremana** dugu beraiekin, seme-alaba maite modura hartu baikaituzte euren etxean. Badakigu ez direla gaztelu misteriotsu batean bizi, baizik eta gardena dela guztia, maitatzea eta maitatua izatea bezain gardena. Jesusen eskutik, Hirutasuneko pertsona bakoitzarekin pertsonalki erlazionatzen ikasi dugu.

Israelgo herriak ere hurbileko errealitate pertsonal gisa esperimentatu zuen Jainkoa, Israel hautatu zuenez, herria Harekin egindako itunari leial izatea espero baitzuen. Hala, harreman pertsonal familiarrak ziren Jainkoaren eta Israelen artekoak. Familiaren irudien bidez adierazten dira, Senarraren eta Emaztearen irudien bidez, batez ere. Israelek modu berezian esperimentatu zuen Jainkoaren Jakinduriaren eta Espirituaren presentzia bere historia zehatzean. Jakinduria hori bertan zegoen sorreraren unean, eta gizakien seme-alabekin zuen gozamina (*Es Za 8, 22-31*).

Esperientzia horiekin, ez zitzaien zaila izan Jesusen ikasleei Jainko presente egiten zela Harengan, eta Jesusek intimitatezko harreman berdingabea zuela Aitarekin. Aitarengandik jasotzen zuen Jesusek dena, eta Aitari itzultzen zion dena (*Jn 16, 12-15*). Baina Jesusen piztueraren ondoren, batez ere, Espiritua Jesusengan eta euren bizitzan zegoela esperimentatu zuten ikasleek. Hark isurtzen baitzigu Jainkoaren maitasuna gure bihotzetara, Hirutasunaren bizia (*Erm 5, 1-5*).

Esperientzia iraultzailea zen, zinez, pentsamendu biblikoarena. Antzinako erlijioetan, Jainkoa bilatzen eta maitatzen du gizakiak, baina Jainkoak ez du maitasunez erantzuten. Zeregin garrantzitsuagoak ditu Hark, eta ez du denbora gizakien arazoekin galtzen. Espirituari esker esperimentatu dugu historikoki Jainkoaren

maitasuna. Semea gu guztiongatik ematea izan da maitasun horren adierazpena, Jainkoaren etsai ginenean, hain zuzen ere. Jainkoaren **barkamenaren esperientzia** da Jainkoaren maitasun baldintzagabea esperimentatzen uzten digun lehenetako bat. Baketze eta adiskidetze esperientzia da, Jainkoaren seme-alaba sentiarazten gaitu, eta hortaz, Jainkoaren maitasuna.

Jainkoaren maitasuna, egunerokotasunean bizi duguna, kristau **itxaropenaren bermea** da, bai baitaki maitasuna ez dela hiltzen, behin betikoaren aurrerapena dela. Itxaropen horri esker, gure ausardia eta erresistentzia frogatuta geratzen dira, gure bizitzan bizi ditugun zailtasunen aurreko ontasunaren aldeko pertseberantziaren bitartez. Kristauak badaki Jaun berpiztuak munduko indar hondatzaile guztiak garaitu dituela. Horregatik, ez dugu etsitzen, ez dugu amore ematen; aitzitik, mundu berria guztiontzat hel dadin borrokatzen gara.

Espirituak eusten gaitu eguneroko borroka horretan, eta Jesusek iragartzen zuen **benetako egian** murgiltzen gaitu. Haren ikasleek, gertatzera zihoanaren alde iluna bakarrik ikusten zuten nekaldiaren bezperan. Espirituak sartuko ditu, pixkanaka, Berpiztuaren behin betiko errealtatean, mundu honetako gorrotoa eta gaizkia gainditu baititu. Egia hori **persona bat** da, baina. Azkenean, konturatuko dira Jesusen bizitzan bete-betean agertu zaiela Jainko Aita. Jesusekin bizi izateko zoria izan zuten ikasleek. Harekin bizitzea Aitarekin bizitzea zen, azken batean.

Eukaristiaren ospakizunean esperimentatzen dugu batez ere Hirutasunaren maitasuna. Bertan, eskerrak ematen dizkiogu Jainko Aitari Jesusengatik Espirituan, salbatu egin gaituelako eta haren bizitza jainkotiarrean sartu gaituelako, munduan presente egin dezagun.

Jainkoaren herriaren otoitza

Senideok: egiogun otoitz Aita maitagarri dugun Jainkoari, Jesu Kristogan bere maitasuna agertu digunari eta Espirituaz eragiten digunari.

—Jainko Aita Sortzaileak mundua bere betera eraman dezan, eta hitz emandako zero-lur berriak sorraraz ditzan, gizadi osoak egiazko zoriona aurkitu eta Bere aurpegi aintzatsua goza ahal izateko. Eska diezaiogun Jaunari.

—Gizon eginik Elizarekin bat egin zen Jainkoaren Seme Bakarrak, eman diezaiola Elizari berari emazte bezala erantzuteko Bere maitasun betea. Eska diezaiogun Jaunari.

—Mundua bere dohainez aberasten duen Jaunaren Espiritua behartsuentzat aita, nahigabetuentzat atsedeen, gaixoentzat osasun eta erorientzat indar gerta dadin. Eska diezaiogun Jaunari.

—Hirutan bakarra den Jainkoaren misterioa ezagutzen dugunok, Haren berri eman diezaiegun ezagutzen ez dutenei, pozez ezagutu dezaten Aita, Seme eta Espiritu agertu zaigun Jainkoa. Eska diezaiogun Jaunari.

Gorets zaitzala Jauna Zure Elizak, jakinduriaz egin baituzu mundua, Jesu Kristoren bidez salbatu baikaituzu eta Espiritu Santuaren indarrez santu egin; entzun Zure herriaren otoitzak eta egizu egiaeren betea ezaguturik, Zu adora zaitzagula, egia, maitasuna eta bizia baitzara. Jesu Kristo gure Jaunaren bitartez.

Eukaristiaren liturgiari oharpena

Bizia ematen digun Semea, eskaintza onartzen duen zeruko Aita, Eukaristian Jainkoaren indar eta eragile dugun Espiritua. Hirutasun santuaren presentzia nabarmena da Eukaristiaren misterioan. Miresmenez, hunkiduraz, esker onez, bat egin dezagun otoitzean.

Jaunartze-ondorengo otoitza

**Jaungoiko gure Jauna,
betiereko Hirutasun santua
eta haren Batasun hautsezina aitortu ditugu;
egizu, aurki dezagula hartu dugun sakramentu honetan
gorputz-arimen osasuna.
Jesu Kristo gure Jaunaren bitartez.**